

Geachte Fest- un Gebuursdagsversammeln !

De KEERLKE 1998 is de 6. in sien Geschicht!

Na Gitta Mennenga för hör Wark mit Kinner in un för Platt-
dütsk kreeg de Gemeen Ihlow hum för HÜlp bi dat Rutgeven
van't Buurman-Woordenbook.

Theda Ahlrichs was de darde Keerlke-Krieger för Plattdütsk
in Kark!

Denn kreeg hum Jan Cornelius för sien Lieder up Platt,
besünners för un mit Kinner.

Verleden Jahr wurr Keerlke overgeven an Theo Schuster,
de Rutgever van sovöl plattdütse Literatur.

Un nu ?

KEERLKE is en Pries as Dank för daan Wark ! Man
KEERLKE is ok en Pries to'n Upmuntern to neei Wark !

De Priesdraggers wurren bit nu hento utsöcht van de Vör-
stand van uns Vereen Oostfreeske Taal.

Dat mutt nich so blieven !

Dat kunn ok anners !

Elk in Oostfreesland sull en Vörslagsrecht hebben,elke
Minsk,elke Koppel,elke Vereen!

Daar kunn ok en Vergeevkoppel insett' worden,en " Jury".

Man sovöl Weeswark um en Pries,de vör de Ogen nich mehr
un nix anners is as 'n Steengoodfigurtje,maakt van

Christian Eisbein,nadeem he Wilhelmine Siefkes hör

KEERLKE-Roman lesen harr ? Gaar kien Priesgeld ?

Nich 'nmaal dusend Mark ?

Disse Namiddag wurr en Pries för nederdütske Literatur
in Bösel vergeven. Mit de kreeg de Winner bovendeem noch
8000.- DM in de Hand! Dat is gien Wunner,dar se daar völ
Texten instürt kriegen,meest un faak van Schrievers,de
al waar anners heel hoog presen sünd. Un mit disse Namen
tieren sük denn ok de Priesvergevers un dünken sük wat.
In't Geheem mag 't woll al son'n Soort Innahmenrekord-
tabelle geven,so as bi't Profi-Tennis. Rekordinnahm mit
Plattdütsk ?

Bi uns löppt daar 'n heel anner Programm!

Na dat Woord: Leven för Plattdütsk, nich leven van Platt
De Vörstand hett mi för de Laudatio,up Oostfreesk PRAHL-
preken,8 Menüten Tied todocht.

De Klocke löppt.

Ik weet,ik mutt futtmaken!

Ditmaal harren wi in DIESEL 24,rutkomen in Julimaant,
uproopen :

WELL SALL KEERLKE VAN 'T JAHR KRIEGEN ?

WELL HETT HUM VERDEENT ?

Well 'n Idee harr,much de an Oostfreeske Taal stüren,
Postfack 1580, 26585 Auerk. Daarbi even seggen,waar de

Pries nu för wesen sull; to 'n Bispill:

'n Moder,de mit hör Kinner Platt proot ?

'n Dokter,de mit sien Patienten oostfreesk snackt ?

'n Journalist,de Platt in't Bladd brengt ?

'n Frau,de olle plattdütse Kookhoken samelt ?

'n Jung,de neje plattdütse Woorden utdenken deit ?

WIE WEET

Daar is nix komen na't Verstüeren van de mehr as 1000 Diesels!

Wiel dat mit de Pries gien Geld gifft ?

Wiel dat de Minsken in uns Land gaar nich wennt sünd, an sowat mittodreihen ?

Wi willen un sullen daar bi blieven: bi't Vörslagsrecht för elke Oostfrees för KEERLKE an en Oostfrees !

Man dit Jahr löppt dat nu noch as elke Jahr siet 1993:

De Vörstand mook sük up de Söke - un is fünnig worden !

KEERLKE 1998 kriggt en Minske, dat up haast alle Rebetten ieverg is, de denkbaar sünd för't Wark, dat Oostfreesland en Tweesprakenland blifft.

Dit Minske - ik holl 't noch wat langer unner't Dookje - um Jo Neeisgier un jo Andacht to, sekern-
dit Minske proot mit de Kinner ^{in ansicht van 'n Minske} wisse platt, un wenn de Dokter kann, ok mit de.

Dit Minske brengt of un to ok wat up Platt in't Bladd; Plattdütse Kookboken woll nich, man seker woll oostfreeske Backrezepten, Broodbackrezepten hett dat ok woll samelt! Heel wisse ok plattdütse Woorden utdocht!

Hett plattdütse Vertellsels un Gedichten in Boken in de Welt laten!

Spölt siet haast 25 Jahr plattdütse Theater; föhrde un föhrt of un to ok Regie in en Spöklottje. Schrift sülvst Bliedstücken un Denkstücken in Oostfreesk! De worden hier overall spölt, man ok buten uns Land! Ik weet, tominnsten een van de Stücken word of wurr in

Süddütsland, amenne in Bayern, up Hoogdütsk spölt.

För wat Stücken kreeg dit Minske ok Priesen !

As ik dit Minske körtens froog, wo dat sük entscheden dee, wenn dat mit de Terminkalenner in Redulten kweem, hörde ik: "Ik treck alltied ~~dat~~ vör, waar ik noch wat lehren kann!" "Kiek", hebb ik docht, "dit Minske is noch en Student in de beste Sinn van't Woord! En Minsk, dat sük alltied Mèite gifft, totolehren! Levenslang, um mörgen mehr to weten un mehr to könen as vandage!

Un in dat Klottje, waar dit Minske in warkt, is buten Streven un Fründskupp ok noch 'n gode soziale Geist wacker: Ik hebb mi vertellen laten, dat dat Spölerklottje mit un um dat Minske in de verleden twintig Jahr van dat inspölt Geld ruugweg 50 000.- DM för gode Dennsten verschunken hett. Daarvan hett ok Oostfreeske Taal wat kregen vör wat Jahren, um plattdütse Leesgood för Kinner drucken to laten!

Dat Minske, dat ik meen, hett ok ut uns Land woll de meeste plattdütse Hörspillen schreven; de sünd van Radio Bremen .ut in de Äther gahn!

^uDat Minske, dat ik meen, dee ok ut uns hoogdütse Literatur, ut uns hoogdütsk Volksgood, in't Oostfreeske overdragen, leet dat drückt in de Welt un versteiht dat - as weer 't >'n Theaterstück - in 'n köstelke Maneer vörtodragen!

WELL SO, AS DIT MINSKE, sovöl Minsken mit uns oostfreeske Sprake bliede maakt, hör Bliedskupp gifft un nich blot Malljagerree - deit, völ för uns Taal un völ för de Minsken!

Nadenkelk un bliede, dat is mögelk. So lett uns dit Minske belevn.
Dit Minske lehrde uns in beste Maneer oostfreeske Vördragskünst.
So hören ji dit Minske in 't Vörleestelefon Oostfreesland un ok in 't Radio
bi „Hör mal 'n beten to“

Dit Minske lett uns belevn, dat beter as gelehrt to wesen, is gelehrtig to blieden,
um sük denn to wunnern, wat daar alls so insteckt. Dit Minske genütt van 't Leven
mit Plattdütsk un lett uns all daarvan geneten. Dat Minske, dat sünner een Tegenstimm
van d' Vörstand van de Oostfreeske Taal de „KEERLKE-PRIES“ tospraken kreeg

As en rundum Talent
Rundum Student
Daarum is völs heel kompetent
För 't plattdütse Wark verherment
En Plattdütsk-Produzent
Overall patent präsent
Mit sien Künsten noch lang nich up Rent
Elk seggt de hum kennt:
He is heel un dall en plattdütse Fent.

Wi danken dit Minske för völs un verwachten noch völl!

Dat is 'n Tofall, seker, dat dit Minske jüst in disse Saal, hier bi Ilse Linemann, en groot Deel
van 't plattdütse Komödiantenleven tobroch.

En Wallinghuser Jung!

Sein Naam is: Ubbo Gerdes!

Johannes Dickhoff 14.11.98